

বুড় সালিকের ঘাড়ে রোঁ

পুরুষ-চরিত্র

ভক্তপ্রসাদ বাবু। পঞ্চানন বাচস্পতি। আনন্দ বাবু। গদাধর। হানিফ গাজি। রাম।

স্ত্রী-চরিত্র

পুটি। ফতেমা (হানিফের পত্নী)। ভগী। পঞ্চী।

প্রথমঙ্ক

প্রথম গর্ভাঙ্ক

পুরুষগীতটে বাদামতলা

গদাধর এবং হানিফ গাজীর প্রবেশ

হানি। (দীর্ঘনিশ্বাস পরিত্যাগ করিয়া) এবার যে পিরির দরগায় কত ছিম্মি দিছি তা আর বলবো কি। তা ভাই কিছুতেই কিছু হয়ে উঠলো না। দশ ছালা ধানও বাড়ী আনতি পাললাম না—খোদাতালার মর্জি।

গদা। বিষ্টি না হল্যে কি কখনও ধান হয় রে? তা দেখ্ এখন কস্তাবাবু কি করেন।

হানি। আর কি করবেন? উনি কি আর খাজনা ছাড়বেন?

গদা। তবে তুই কি করবি?

হানি। আর মোর মাথা করবো! এখনে মলিই বাঁচি। এবার যদি লাঙ্গলখান আর গরু দুটো যায় তা হলি তো আমিও গেলাম। হা আন্না! বাপ দাদার ভিটেটাও কি আখেরে ছাড়তি হলো!

গদা। এই যে কস্তাবাবু এদিকে আসছেন। তা আমিও তোর হয়ে দুই এক কথা বলতে কসুর করবো না। দেখ্ কি হয়।

ভক্তবাবুর প্রবেশ

হানি। কস্তাবাবু, সালাম, করি।

ভক্ত। (বৃক্ষমূলে উপবেশন করিয়া) হ্যাঁ হান্ফে, তুই বেটা তো ভারি বজ্জাত্। তুই খাজনা দিস্ নে কেন রে, বল্ তো? (মালা জপন।)

হানি। আগে কস্তা, এবারহার ফসলের হাল আপনি-তো সব ওয়াকিফ হয়েচেন।

ভক্ত। তোদের ফসল হোক আর না হোক তাতে আমার কি ব্যয়ে গেল।

হানি। আগে, আপনি হচোন কস্তা—

ভক্ত। মর্ বেটা, কোম্পানীর সরকার তো আমাকে ছাড়বে না। তা এখন বল্—খাজনা দিবি কি না।

হানি। কস্তাবাবু, বন্দা অনেক কল্যে রাইওৎ, এখানে আপনি আমার উপর মেহেরবানি না কল্য আমি আর যাবো কনে। আমি এখনে বারোটি গোশা পয়সা ছাড়া আর এক কড়াও দিতি পারি না।

ভক্ত। তুই বেটা তো কম বজ্জাত্ নস্ রে। তোর ঠেয়ে এগারো সিকে পাওয়া যাবে, তুই এখন্ তাতে কেবল তিন সিকে দিতে চাস্। গদা—

গদা। আঞ্জেএএএ।

ভক্ত। এ পাঞ্জি বেটাকে ধরে নে যেয়ে জমাদারের জিম্মে করে দে আয় তো।

গদা। যে আঞ্জে। (হানিফের প্রতি) চল্ রে।

হানি। কস্তাবাবু, আমি বড় কাস্কাল রাইওৎ! আপনার খায়ে পরেই মানুষ হইছি, এখনে আর যাবো কনে?

ভক্ত। নে যা না—আবার দাঁড়াস্ কেন? গদা। চল্ না।

হানি। দোয়াই কস্তার, দোয়াই জমাদারের। (গদার প্রতি জনান্তিকে) তুই ভাই আমার হয়ে দুএটা কথা বল্ না কেন?

গদা। আচ্ছা। তবে তুই একটু সরে দাঁড়া। (ভক্তের প্রতি জনান্তিকে) কস্তাবাবু—

ভক্ত। কি রে—
গদা। আপনি হান্ফেকে এবারকার মতন
মাফ করুন।

ভক্ত। কেন?

গদা। ও বেটা এবার যে ছুঁড়ীকে নিকে
করেছে তাকে কি আপনি দেখেছেন?

ভক্ত। না।

গদা। মশায়, তার রূপের কথা আর কি
বলবে? য়েস বছর উনিশ, এখনও ছেলে পিলে
হয়নি, আর রঙ যেন কাঁচা সোণা।

ভক্ত। (মালা শীল জপিতে জপিতে) আঁ,
আঁ, বলিস্ কি রে?

গদা। আজে, আপনার কাছে কি আর
মিথ্যে বলচি? আপনি তাকে দেখতে চান তো
বলুন।

ভক্ত। (চিন্তা করিয়া) মুসলমান মাগীদের
মুখ দিয়ে যে প্যাঁজের গন্ধ ভক্ভক্ করে বেরোয়
তা মনে হলো বমি এসে।

গদা। কস্তাবাবু, সে তেমন নয়।

ভক্ত। (চিন্তা করিয়া) মুসলমান! যবন!
ম্লেচ্ছ! পরকালটাও কি নষ্ট করবো?

গদা। মশায়, মুসলমান হলো তো বয়ে
গেল কি? আপনি না আমাকে কত বার বলেছেন
যে শ্রীকৃষ্ণ ব্রজে গোয়ালাদের মেয়েদের নিয়ে
কেলি কতেন।

ভক্ত। দীনবন্ধো, তুমিই যা কর। হাঁ,
স্ট্রীলোক—তাদের আবার জাত কি? তারা তো
সাক্ষাৎ প্রকৃতিস্বরূপা, এমন তো আমাদের
শাস্ত্রেও প্রমাণ পাওয়া যাচে; বড় সুন্দরী বটে,
আঁ? আচ্ছা ডাক, হান্ফেকে ডাক।

গদা। ও হানিফ্, এদিকে আয়।

হানি। আঁ, কি?

ভক্ত। ভাল, আমি যদি আজ তিন সিকে
নিয়ে তোকে ছেড়ে দি, তবে তুই বাদবাকি টাকা
কবে দিবি বল দেখি?

হানি। কস্তামশায়, আন্নাতালা চায় তো
মাস দ্যাড়েকের বিচেই দিতি পারবো।

ভক্ত। আচ্ছা, তবে পয়সাগুলো
দেওয়ান্জীকে দে গে।

হানি। (সহর্বে) য্যাগ্যে কস্তা, (স্বগত)
বাঁচলাম! বারো গন্ডা পয়সা তো গাঁটি আছে,

আর আট সিকে কাছায় বাস্ক্যে আনেছি, যদি
বড় পেড়াপিড়ি কস্তো তা হলি সব দিয়ে
ফ্যালতাম্। (প্রকাশে) সালাম কস্তা।

—প্রস্থান।

ভক্ত। ওরে গদা

গদা। আজেএএএ।

ভক্ত। এ ছুঁড়ীকে তো হাত কতয়ে পারবি?

গদা। আজে, তার ভাবনা কি? গোটা
কুড়িক্ টাকা খরচ কল্যে—

ভক্ত। কু-ডি-টা-কা! বলিস্ কি?

গদা। আজে এর কম হবে না, বরঞ্চ
জেয়াদা নাগলেও নাগদে পারে, হাজারো হোক
ছুঁড়ী বউমানুষ কি না।

ভক্ত। আচ্ছা, আমি যখন বৈটকখানায়
যাবো তখন আসিস্, টাকা দেওয়া যাবে।

গদা। যে আজে।

ভক্ত। (নেপথ্যাভিমুখে অবলোকন করিয়া)
ও কে? বাচস্পতি না?

বাচস্পতির প্রবেশ

কে ও? বাচস্পতি দাদা যে। প্রণাম। এ কি?

বাচ। আর দুঃখের কথা কি বলবো, এত
দিনের পর মা ঠাকুরগণের পরলোক হয়েছে।
(রোদন।)

ভক্ত। বল কি? তা এ কবে হলো?

বাচ। অদ্য চতুর্থ দিবস।

ভক্ত। হয়েছিল কি?

বাচ। এমন কিছু নয়, তবে কি না বড় প্রাচীন
হয়েছিলেন।

ভক্ত। প্রভো, তোমারই ইচ্ছা! এ বিষয়ে
ভাই আক্ষিপ করা বৃথা।

বাচ। তা সত্য বটে তবে এক্ষণে আমি এ
দায় হতে যাতে মুক্ত হই তা আপনাকে কতয়ে
হবে। যে কিঞ্চিৎ ব্রহ্মত্র ভূমি ছিল, তা তো
আপনার বাগানের মধ্যে পড়াতে বাজেয়াপ্ত হয়ে
গিয়েছে।

ভক্ত। আরে, যা হয়ে বয়ে গিয়েছে সে
কথা আর কেন?

বাচ। না, সে তো গিয়েইছে “গতস্য
শোচনা নাস্তি” সে তো এমনেও নেই অমনেও
নেই, তবে কি না আপনার অনেক ভরসা করে

থাকি, তা যাতে এ দায় হতে উদ্ধার হতে পারি, তা আপনাকে অবশ্যই করতে হবে।

ভক্ত। আমার ভাই এ নিতান্ত কুসময়, অতি অল্প দিনের মধ্যেই প্রায় বিশ হাজার টাকা খাজনা দাখিল করতে হবে।

বাচ। আপনার এ রাজসংসার। মা কমলার কৃপায় আপনার অপ্রতুল কিসের? কিঞ্চিৎ কটাক্ষ কল্যে আমার মত সহস্র লোক কত দায় হতে উদ্ধার হয়।

ভক্ত। আমি যে এ সময়ে ভাই তোমার কিছু উপকার করে উঠি, এমন তো আমার কোন মতেই বোধ হয় না। তা তুমি ভাই অন্যন্তরে চেষ্টা কর। দেখি, এর পরে যদি কিছু করতে পারি।

বাচ। বাবুজী, আপনি হচেন ভূস্বামী, রাজা; আপনার সম্মুখে তো আর অধিক কিছু বলা যায় না; তা আপনার যা বিবেচনা হয় তাই করুন। (দীর্ঘনিশ্বাস) এক্ষণে আমি তবে বিদায় হলেয়াম।

ভক্ত। প্রণাম।

[বাচস্পতির প্রস্থান।

আঃ, এই বেটারাই আমাকে দেখছি ডুবুলে। কেবল দাও। দাও। দাও। বই আর কথা নাই। ওরে গদা—

গদা। আজেএএ।

ভক্ত। ছুঁড়ী দেখতে খুব ভাল তো রে।

গদা। কত্তামশায়, আপনার সেই ইচ্ছেকে মনে পড়ে তো!

ভক্ত। কোন ইচ্ছে?

গদা। আজে ঐ যে ভট্টচার্যীদের মেয়ে। আপনি যাকে—(অর্দ্ধোক্তি)—তার পরে যে বেরিয়ে গিয়ে কসবায় ছিল।

ভক্ত। হাঁ! হাঁ! ছুঁড়ীতে দেখতে ছিল ভাল বটে (দীর্ঘনিশ্বাস পরিত্যাগ করিয়া) রাধে কৃষ্ণ! প্রভো তুমিই সত্য। তা সে ইচ্ছের এখন কি হয়েছে রে?

গদা। আজে সে এখন বাজারে হয়ে পড়েছে। হান্ফের মাগ তার চাইতেও দেখতে ভাল।

ভক্ত। বলিস্ কি! অ্যা? আজ রাধে ঠিকঠাক কতো পারবি তো?

গদা। আজে, আজ না হয় কাল পরশুর মধ্যে করে দেব।

ভক্ত। দেখ, টাকার ভয় করিস্ না। যত খরচ লাগে আমি দেব।

গদা। যে আজে। (স্বগত) কত্তাটি এমনি খেপে উঠলিই তো আমরা বাঁচি,—গো মড়কেই মুচির পার্বণ।

ভক্ত। (নেপথ্যাভিমুখে অবলোকন করিয়া) ও—কে ও রে?

গদা। আজে, ও ভগী আর তার মেয়ে পাঁচি। জল আনতে আস্চে।

ভক্ত। কোন ভগী রে?

গদা। আজে, পীতেশ্বরে তেলীর মাগ।

ভক্ত। ঐ কি পীতেশ্বরের মেয়ে পক্ষী? এ যে গোবরে পদ্মফুল ফুটেছে।

গদা। আজে, ও আজ দুদিন হলো শ্বশুরবাড়ী থেকে এসেছে।

ভক্ত। (স্বগত) “মেদিনী হইল মাটি নিতম্ব দেখিয়া। অদ্যপি কাঁপিয়া উঠে থাকিয়া থাকিয়া।”^২ আহা! “কুচ হৈতে কত উচ্চ মেরু চূড়া ধরে। শিহরে কদম্ব ফুল দাড়িম্ব বিদরে।।”^২

গদা। (স্বগত) আবার ভাব লাগলো দেখচি। বুড়ো হলে লোভাস্তি হয়; কোন ভালমন্দ জিনিস সামনে দিয়ে গেলে আর রক্ষে থাকে না।

ভক্ত। ওরে গদা—

গদা। আজেএএ।

ভক্ত। এদিকে কিছু কতো টতো পারিস?

গদা। আজে, ও বড় সহজ কথা নয়। ওর বড়মানুষের ঘরে বিয়ে হয়েছে শুনেছি।

কলসী লইয়া ভগী এবং পক্ষীর প্রবেশ

ভক্ত। ওগো বড়বউ, এ মেয়েটি কে গা?

ভগী। সে কি কত্তাবাবু? আপনি আমার পাঁচিকে চিনতে পারেন না?

ভক্ত। এই কি তোমার সেই পাঁচি? আহা, ভাল ভাল, মেয়েটি বেঁচে থাকুক্। তা এর বিয়ে হয়েছে কোথায়?

২. কবি ভারতচন্দ্রের বিদ্যাসুন্দর কাব্যের বিদ্যার রূপবর্ণনার অনুরূপ।

ভগী। আজ্ঞে খানাকুল কৃষ্ণনগরে পালেদের বাড়ী।

ভক্ত। হাঁ, হাঁ তারা খুব বড়মানুষ বটে। তা জামাইটি কেমন গা?

ভগী। (সগর্বে) আজ্ঞে, জামাইটি দেখতে বড় ভাল। আর কল্কেতায় থেকে লেখা পড়া শেখে। শুনেছি যে লাট সাহেব তারে নাকি বড় ভালবাসেন, আর বছর ২ এক একখানা বই দিয়ে থাকেন।

ভক্ত। তবে জামাইটি কল্কেতাতেই থাকে বটে?

ভগী। আজ্ঞে হাঁ। মেয়েটিকে যে এবার মশায় কত করে এনেছি তার আর কি বলবো। বড় ঘরে মেয়ে দিলে এই দশাই ঘটে।

ভক্ত। হাঁ, তা সত্য বটে। (স্বগত) ছুঁড়ীর নবযৌবনকাল উপস্থিত, তাতে আবার স্বামী থাকে বিদেশে। এতেও যদি কিছুনা কত্যা পারি তবে আর কিসে পারবো। (প্রকাশে) ও পাঁচি, একবার নিকটে আয় তো তোকে ভাল করে দেখি। সেই তোকে ছোটটি দেখেছিলেম, এখন তুই আবার ডাগর ডোগরটি হয়ে উঠেছিস।

ভগী। যা না মা, ভয় কি? কত্তাবাবুকে গিয়ে দস্তবৎ কর, বাবু যে তোর জেঠা হন।

পক্ষী। (অগ্রসর হইয়া প্রণাম করিয়া স্বগত) ও মা! এ বড় মিনসে তো কম নয় গা। এ কি আমাকে খেয়ে ফেলতে চায় না কি? ও মা, ছি। ও কি গো? এ যে কেবল আমার বুকের দিকেই তাকিয়ে রয়েছে? মর।

ভক্ত। (স্বগত) “শিহরে কদম্ব ফুল দাড়িম্ব বিদরে” আহাহা!

ভগী। আপনি কি বলছেন?

ভক্ত। না। এমন কিছু নয়। বলি মেয়েটি এখানে কদ্দিন থাকবে।

ভগী। ওর এখানে এক মাস থাকবার কথা আছে।

ভক্ত। (স্বগত) তা হলেই হয়েছে। ধনঞ্জয় অষ্টাদশ দিনে একাদশ অশ্বোহিণী সেনা সমরে বধ করেন, আমি কি আর এক মাসে একটা তেলীর মেয়েকে বশ কত্যা পারবো না? (প্রকাশে) কৃষ্ণ হে তোমার ইচ্ছে।

ভগী। কত্তাবাবু! আপনি কি বলছেন?

ভক্ত। বলি, পীতাম্বর ভায়া আজ কোথায়?

ভগী। সেনুনের জন্যে কেশবপুরের হাটে গেছে।

ভক্ত। আসবে কবে?

ভগী। আজ্ঞে চার পাঁচ দিনের মধ্যে আসবে. বলে গেছে। কত্তাবাবু, এখন আমরা তবে ঘাটে জল আনতে যাই।

ভক্ত। হাঁ, এসো গে?

ভগী। আয় মা, আয়।

[ভগী এবং পক্ষীর প্রস্থান।

ভক্ত। (স্বগত) পীতেশ্বরে না আসতে ২ এ কস্ম্টি সারতে পারলে হয়। (নেপথ্যাভিমুখে অবলোকন করিয়া) আহা! ছুঁড়ী কি সুন্দরী। কবিরা যে নবযৌবনা স্ত্রীলোককে মরালগামিনী বলে বর্ণনা করেন, সে কিছু মিথ্যা নয়। (প্রকাশে) ও গদা—

গদা। আজ্ঞে। (স্বগত) এই আবার সালো দেখচি।

ভক্ত। কাছে আয় না। দেখ, এ বিষয়ে কিছু কত্যা পারিস?

গদা। কত্তামশায়! এ আমার কস্ম্ নয়। তবে যদি আমার পিসী পারে তা বলতে পারি নে।

ভক্ত। তবে যা দৌড়ে গিয়ে তোর পিসীকে এসব কথা বল্গে। আর দেখ, এতে যত টাকা লাগে আমি দেবো।

গদা। যে আজ্ঞে, তবে আমি যাই। (গমন করিতে ২) কত্তা আজকে কল্পতরু, তা দেখি গদার কপালে কি ফলে।

[প্রস্থান।

ভক্ত। (স্বগত) প্রভো, তোমারই ইচ্ছা। আহা, ছুঁড়ীর কি চমৎকার রূপ গা, আর একটু ছেলালিও আছে। তা দেখি কি হয়।

চাকরের গাডু গামছা লইয়া প্রবেশ

এখন যাই, সন্ধ্যা আফিকের সময় উপস্থিত হলো। (গাত্রোত্থান করিয়া) দীনবন্ধো! তুমিই যা কর। আঃ, এ ছুঁড়ীকে যদি হাত কত্যা পারি।

[উভয়ের প্রস্থান।

দ্বিতীয় গর্ভাঙ্ক

হানিফ্ গাজীর নিকেতন-সম্মুখ

হানিফ্ এবং ফতেমার প্রবেশ

হানি। বলিস্ কি? পঞ্চাশ টাকা?

ফতে। মুই কি আর ঝুঁট কথা বলছি।

হানি। (সরোষে) এমন গরুখোর হারামজাদা কি হেঁদুদের বিচে? আর দুজন আছে? শালা রাইওৎ বেচারীগো জানে মারো, তাগোর সব লুটে লিয়ে, তার পর এই করে। আচ্ছা দেখি, এ কুম্পানির মূলুকে এনছাফ্ আছে কি না। বেটা কাফেরকে আমি গোরু খাওয়িয়ে তবে ছাড়বো। বেটার এত বড় মক্দুর^১। আমি গরিব হলাম বল্যে বয়ে গেলো কি? আমার বাপ দাদা নওয়াবেবের সরকারে চাকুরী করেছে আর মোর বুন কখনো বারয়ে গিয়ে তো কসবগিরি^২ করে নি। শালা—

ফতে। আরে মিছে গোসা কর কেন? ঐ দেখ, যে কুটনী মাগীকে মোর কাছে পেটয়েছাল, সে ফের এই দিগে আসতেচে।

হানি। গন্ডানীর মাথাটা ভাঙ্তি পান্তাম, তা হলি গা-টা ঠাণ্ডা হতো।

ফতে। চল, মোরা একটু তফাতে দাঁড়াই, দেখি মাগী আস্যে কি করে।

[উভয়ের প্রস্থান।

পুঁটির প্রবেশ

পুঁটি। (চতুর্দিক্ অবলোকন করিয়া স্বগত) থু, থু। পাতিনেড়ে বেটাদের বাড়ীতেও আসতে গা বমি বমি করে। থু, থু। কুঁকড়র পাখা, প্যাঁজের খোসা। থু, থু। তা করি কি? ভক্তবাবু কি এ কস্মে কখনও ক্ষান্ত হবে। এত যে বড়, তবু আজো যেন রস উতলে পড়ে। আজ না হবে তো ত্রিশ বছর ওর কস্ম কচ্ছি, এতে যে কত কুলের ঝি বউ, কত রাড়, কত মেয়ের পরকাল খেয়েছি তার ঠিকানা নাই। (সহাস্য বদনে) বাবু এদিকে আবার পরম বৈষ্টব, মালা ঠকঠকিয়ে বেড়ান—ফি সোমবারে হবিম্বি করেন—আ

মরি, কি নিষ্ঠে গা! (চিন্তা করিয়া) সে যাক্ মেনে, দেখি এখন এ মাগীকে পারি কি না। পীতেশ্বরে তেলীর মেয়েকে এসব কথা বলতে ভয় পায়। সে তো আর দুঃখী কান্দালের বউ নয় যে দুই চার টাকা দেখলে নেচে উঠবে। আর ভক্তবাবুর যদি যুবকাল থাকতো তা হলেও ক্ষতি ছিলো না। ছুঁড়ী যদি নারাজ হয়ে রাগতো তা হলেও নয় কথাটা ঠাট্টা করেই উড়য়ে দিতেম। তা দেখি, এখানে কি হয়। (উচ্চৈঃ স্বরে) ও ফতি! তুই বাড়ী আছিস?

নেপথ্যে। ও কে ও?

পুঁটি। আমি, একবার বেরো তো।

ফতেমার প্রবেশ

ফতে। পুঁটি দিদি যে, কি খবর?

পুঁটি। হানিফ্ কোথায়?

ফতে। সে ক্ষেতে লাঙ্গল দিতি গেছে।

পুঁটি। (স্বগত) আপদ্ গেছে। মিন্‌সে মেন যমের দূত। (প্রকাশে) ও ফতি, তুই এখন বলিস্ কি ভাই?

ফতে। কি বলবো?

পুঁটি। আর কি বলবি? সোণার খাবি, সোণার পরবি, না এখানে বাঁদী হয়ে থাকবি? ফতে। তা ভাই যার যেমন নসিব^৩। তুই মোকে জওয়ান^৪ খসম^৫ ছেড়ে একটা বুড়র কাছে যাতি বলিস্, তা সে বুড় মলি ভাই আমার কি হবে?

পুঁটি। আঃ! ও সব কপালের কথা, ও সব কথা ভাবতে গেলে কি কাজ চলে? এই দেখ্ পঁচিশটে টাকা এনেছি। যদি এ কস্ম করিস্ তো বল, টাকা—দি; আর না করিস্ তো তাও বল, আমি চল্লেম।

ফতে। দাঁড়া ভাই, একটু সবুর কর না কেন।

পুঁটি। তুই যদি ভাই আমার কথা শুনিস্ তবে তোর আর দেরি করে কাজ নেই।

ফতে। (চিন্তা করিয়া) আচ্ছা ভাই, দে টাকা দে।

৩. মধ্য। ৪. ন্যায়বিচার। ৫. দুঃসাহস। ৬. বেশ্যাবৃত্তি। ৭. অদৃষ্ট। ৮. যুবক। ৯. স্বামী।

পুটি। দেখিস্ ভাই, শেষে যেন গোল না হয়।

ফতে। তার জন্যে ভয় কি? আমি সাঁজের বেলা তোদের বাড়ীতে যাব এখন। দে, টাকা দে। তা ভাই, এ কথা তো কেউ মালুম^{১০} কতি পারবে না?

পুটি। কি সৰ্কনাশ! তাও কি হয়। আর এ কথা লোকে টের পেলে আমাদের যত লাজ তোর তো তত নয়। আমরা হলেম হিন্দু, তুই হলি নেড়েদের মেয়ে, তোদের তো আর কুলমান নাই, তোর রাড় হলে আবার বিয়ে করিস্।

ফতে। (সহাস্য বদনে) মোরা রাড় হলি নিকা করি, তোরা ভাই কি করিস্ বল দেখি। সে যা হৌক মেনে^{১১} এখন দে, টাকা দে।

পুটি। এই নে?

ফতে। (টাকা গণনা করিয়া) এ যে কেবল এক কম পাঁচ গন্ডা টাকা হলো।

পুটি। ছ টাকা ভাই আমার দুস্তুরি।

ফতে। না, না, তা হবে না, তুই ভাই দু টাকা নে।

পুটি। না ভাই, আমাকে না হয় চারটে টাকা দে।

ফতে। আচ্ছা, তবে তুই বাকি দুটো টাকা ফিরিয়ে দে।

পুটি। এই নে—আর দেখ্, তুই সাঁজের বেলা ঐ আঁব—বাগানে যাস্, তার পরে আমি এসে তোকে নে যাবো।

ফতে। আচ্ছা, তুই তবে এখন যা।

পুটি। দেখ্ ভাই, এ কম মানুষের টাকা নয়, এ টাকা বজ্জাতি করে হজম করা তোর আমার কস্ম নয়, তা এখন আমি চল্লেম।

[প্রস্থান।

হানিফের পুনঃপ্রবেশ

হানি। (নেপথ্যাভিমুখে অবলোকন করিয়া সরোবে) হরামজাদীর মাথাটা ভাঙ্গি, তা হলি গা জুড়য়। হা আন্না, এ কাফের শালা কি

মুসলমানের ইজ্জত্ মাত্তি চায়। দেখিস্ ফতি, যা কয়ে দিচ্ছি, যেন ইয়াদু^{১২} থাকে, আর তুই সমঝে^{১৩} চলিস্; বেটা বড় কাফের, যেন গায়টায় হাত না দিতি পায়।

ফতে। তার জন্যি কিছু ভাবতি হবে না। ঐ দেখ্, এদিকে কেটা আসতেচে, আমি পালাই।

[প্রস্থান।

বাচস্পতির প্রবেশ

বাচ। (স্বগত) অনেক কাঠের দেখছি আবশ্যক হবে, তা ঐ প্রাচীন তেঁতুলগাছটাই কাটা যাউক না কেন? আহা! বাল্যাবস্থায় যে ঐ বৃক্ষমূলে কত ক্রীড়া করেছি তা স্মরণপথারাঢ় হলে মনটা চঞ্চল হয়। (দীর্ঘনিশ্বাস পরিত্যাগ করিয়া) দূর হোক, ও সব কথা আর এখন ভাবলে কি হবে। (উচ্চৈঃস্বরে) ও হানিফ গাজী।

হানি। আগে, কি বল্চো?

বাচ। ওরে দেখ্, একটা তেঁতুলগাছ কাটতে হবে, তা তুই পারবি?

হানি। পারবো না কেন?

বাচ। তবে তোর কুড়ালিখানা নে আমার সঙ্গে আয়।

হানি। ঠাকুর, কস্তাবাবু এই ছরাদের জন্যি তোমাকে কি দেছে গা?

বাচ। আরে ও কথা আর কেন জিজ্ঞাসা করিস্? যে বিঘে কুড়িক ব্রনাত্র ছিল তা তো তিনি কেড়ে নিয়েছেন, আর এই দায়ের সময় গিয়ে জানালাম, তা তিনি বল্যেন যে এখন আমার বড় কুসময়, আমি কিছু দিতে পার্বে্যা না; তার পরে কত করে বল্যে কয়ে পাঁচটি টাকা বার করেছি। (দীর্ঘনিশ্বাস) সকলি কপালে করে!

হানি। (চিন্তা করিয়া) ঠাকুর, একবার এদিকে আসো তো, তোমার সাথে মোর থোড়া^{১৪} বাং চিত্^{১৫} আছে।

বাচ। কি বাং চিত্, এখানেই বল্ না কেন?

১০. জানা বা অনুভব করা। ১১. সে যাই হোক। ১২. স্মরণ। ১৩. বিবেচনা করে, সতর্ক হয়ে। ১৪. কিছু। ১৫. কথাবার্তা।

হানি। আগে না, একবার ঐদিকে যাতি হবে।

বাচ। তবে চল।

[উভয়ের প্রস্থান।

ফতেমার এবং পুটির পুনঃপ্রবেশ

পুটি। না ভাই, ও আব-বাগানে হলো না।

ফতে। তবে তুই ভাই মোকে কোথায় নিয়ে যেতে চাস্ তা বল্?

পুটি। দেখ্, ঐ যে পুখুরের ধারে ভান্কা শিবের মন্দির আছে, সেইখানে তোকে যেতে হবে, তা তুই রাত্ চার ঘড়ীর সময় ঐ গাছতলায় দাঁড়াস্, তার পরে আমি এসে যা কত্য়ে হয় করে কন্মে দেবো।

ফতে। আচ্ছা, তবে তুই যা দেখিস্ ভাই এ কথা যেন কেউ টের না পায়।

পুটি। ওলো, তুই কি কায়েত না বামণের মেয়ে যে তোর এতো ভয় লো?

ফতে। আমি যা হই ভাই, আমার আদমি* এ কথা টের পালি আমাগো দুজনকেই গলা টিপে মেয়ে ফেলাবে।

পুটি। (সত্রাসে) সে সন্তি কথা। উঃ! বেটা যেন ঠিক্ যমদূত। তবে আমি এখন যাই।

[প্রস্থান।

ফতে। (স্বগত) দেখি, আজ রাতির বেলা কি তামাশা হয়; এখন যাই, খানা পাকাই গে।

[প্রস্থান।

বাচস্পতি এবং হানিকের পুনঃপ্রবেশ

বাচ। শিব! শিব! এ বয়সেও এতো? আর তাতে আবার যবনী। রাম বলো! কলিদেব এত দিনেই যথার্থরূপে এ ভারতভূমিতে আবির্ভূত হলেন। হানিফ্, দেখ্, যে কথা বল্যেম তাতে যেন খুব সতর্ক থাকিস। এতে দেখ্ছি আমাদের উভয়েরই উপকার হতো পারবে।

হানি। য্যাগ্যে, তার জন্যি ভাবতি হবে না। বাচ। এখন চল। তোর কুড়ালি কোথায়? হানি। কুরুলখানা বুঝি ক্ষেতে পড়ে আছে। চল।

[উভয়ের প্রস্থান।

ইতি প্রথমঙ্ক

দ্বিতীয়ঙ্ক

প্রথম গর্ভাঙ্ক

ভক্তপ্রসাদ বাবুর বৈটকখানা

ভক্তবাবু আসীন

ভক্ত। (স্বগত) আঃ! বেলাটা কি আজ আর ফুরবে না? (হাই তুলিয়া) দীনবন্ধো! তোমারই ইচ্ছা। পুটি বলে যে পক্ষী ছুঁড়ীকে পাওয়া দুষ্কর, কি দুঃখের বিষয়। এমন কনকপদ্মটি তুলতে পাল্লেম না হে! সসাগরা পৃথিবীকে জয় কর্যে পার্ধ কি অবশেষে প্রমীলার^{১৭} হস্তে পরাভূত হলেন। যা হৌক, এখন যে হান্ফের মাগটাকে পাওয়া গেছে এও একটা আত্মাদের বিষয় বটে। ছুঁড়ী দেখতে মন্দ নয়, বয়স অল্প, আর নব-যৌবনমদে একবারে যেন ঢলে ঢলে পড়ে। শাস্ত্রে বলেছে যে যৌবনে কুকুরীও ধন্য! (চতুর্দিক্ অবলোকন করিয়া) ইঃ! এখনও না হবে তো প্রায় দুই তিন দন্ড বেলা আছে। কি উৎপাত।

আনন্দ বাবুর প্রবেশ

কে ও, আনন্দ নাকি? এসো বাপু এসো, বাড়ী এসেছে কবে?

আন। (প্রণাম ও উপবেশন করিয়া) আজ্ঞে, কাল রাত্রে এসে পৌঁছেছি।

ভক্ত। তবে^{১৮} কি সংবাদ, বল দেখি শুনি।

আন। আজ্ঞে, সকলই সুসংবাদ। অনেক দিন বাড়ী আসা হয় নি বল্যে মাস খানেকের ছুটি নিয়ে এসেছি।

১৬. মানুস। স্বামী অর্থেও ব্যবহৃত হয়। ১৭. মহাভারতে অশ্বমেধপর্কের প্রসঙ্গ। ১৮. মধুসূদনের 'তবে' শব্দ ব্যবহারের মুদ্রাদোষ এখন থেকে কমে এসেছে।

ভক্ত। তা বেশ করেছে। আমার অধিকার সঙ্গে সাক্ষাৎ হয়েছিল ?

আন। আঞ্জে, অধিকার সঙ্গে কল্কেতায় তো আমার প্রায় রোজই সাক্ষাৎ হয়।

ভক্ত। কেন ? তুমি না পাথুরেঘাটায় থাক ?

আন। আঞ্জে, থাকতেম বটে, কিন্তু এখন উঠে এসে খিদিরপুরে বাসা করেছি।

ভক্ত। অধিকার লেখাপড়া হ্যে কেমন ?

আন। জেঠা মহাশয়, এমন ক্লেবর্ ছোকরা তো হিন্দু কালেজে আর দুটি নাই।

ভক্ত। এমন কি ছোকরা বললে বাপু ?

আন। আঞ্জে, ক্লেবর্, অর্থাৎ সুচতুর—মেধাবী।

ভক্ত। হাঁ! হাঁ! ও তোমাদের ইংরাজী কথা বটে ? ও সকল, বাপু, আমাদের কানে ভাল লাগে না। জহীন কিম্বা চালাক বললে আমরা বুঝতে পারি। ভাল, আনন্দ! তুমি বাপু অতি শিষ্ট ছেলে, তা বল দেখি, অধিকা তো কোন অধর্মাচরণ শিখছে না।

আন। আঞ্জে, অধর্মাচরণ কি ?

ভক্ত। এই দেব ব্রাহ্মণের প্রতি অবহেলা গঙ্গানানের প্রতি ঘৃণা, এই সকল খ্রীষ্টিয়ানি মত—

আন। আঞ্জে, এ সকল কথা আমি আপনাকে বিশেষ করে বলতে পারি না।

ভক্ত। আমার বোধ হয় অধিকাপ্রসাদ কখনই এমন কুকর্মাচারী হবে না—সে আমার ছেলে কি না। প্রভো! তুমিই সত্য! ভাল, আমি শুনেছি যে কল্কেতায় না কি সব একাকার হয়ে যাচ্ছে ? কায়স্থ, ব্রাহ্মণ, কৈবর্ত, সোণারবেণে, কপালী, তাঁতী, জোলা, তেলী, কলু, সকলই না কি একত্রে উঠে বসে, আর খাওয়া দাওয়াও করে ? বাপু, এ সকল কি সত্য ?

আন। আঞ্জে, বড় যে মিথ্যা তাও নয়।

ভক্ত। কি সর্বনাশ! হিন্দুয়ানির মর্যাদা দেখি আর কোন প্রকারেই রেলো না। আর রৈবেই বা কেমন করে ? কলির প্রতাপ দিন দিন বাড়ছে বই তো নয়। (দীর্ঘনিশ্বাস পরিত্যাগ করিয়া) রাখে কৃষ্ণ!

গদাধরের প্রবেশ

কেও ?

গদা। আঞ্জে, আমি গদা। (এক পার্শ্বে দণ্ডায়মান।)

ভক্ত। (ইসারা।)

গদা। (ঐ)

ভক্ত। (স্বগত) ইঃ, আজ কি সন্ধ্যা হবে না না কি। (প্রকাশে) ভাল, আনন্দ! শুনেছি—কল্কেতায় না কি বড় বড় হিন্দু সকল মুসলমান বাবুঁটা রাখে ?

আন। আঞ্জে, কেউ কেউ শুনেছি রাখে বটে।

ভক্ত। থু! থু! বল কি ? হিন্দু হয়ে নেড়ের ভাত খায় ? রাম! রাম! থু! থু!

গদা। (স্বগত) নেড়ীদের ভাত খেলে জাত যায়, কিন্তু তাদের মেয়েদের নিলে কিছু হয় না। বাঃ! বাঃ! কত্তাবাবুর কি বুদ্ধি!

ভক্ত। অধিকাকে দেখি আর বিস্তর দিন কল্কেতায় রাখা হবে না।

আন। আঞ্জে, এখন অধিকাকে কালেজ থেকে ছাড়ান কোন মতেই উচিত হয় না।

ভক্ত। বল কি বাপু ? এর পরে কি ইংরাজী শিখে আপনার কুলে কলঙ্ক দেবে ? আর “মরা গরুতেও কি ঘাস খায়” এই বলে কি পিতৃপিতামহের শ্রাদ্ধটাও লোপ করবে ?

নেপথ্যে। (শংখ, ঘণ্টা, মৃদঙ্গ, করতাল ইত্যাদি।)

ভক্ত। এসো, বাপু, ঠাকুরদর্শন করি গে।

আন। যে আঞ্জে, চলুন।

[উভয়ের প্রস্থান।

গদা। (স্বগত) এখন বাবুরা তো গেলো। (চতুর্দিক অবলোকন করিয়া) দেখি একটু আরাম করি। (গদির উপর উপবেশন।) বাঃ! কি নরম বিছনা গা। এর উপরে বসলিই গা-টা যেন ঘুম ঘুম কতো থাকে। (উচ্চৈঃস্বরে) ও রাম।

নেপথ্যে। কেও ?

গদা। আমি গদাধর। ও রাম, বলি এক ছিলিম অশুরী তামাক টামাক খাওয়া না।

নেপথ্যে। রোস, খাওয়াচি।

গদা। (তাকিয়ায় ঠেস দিয়া স্বগত) আহা, কি আরামের জিনিস। এই বাবু বেটোরাই মজা

করে নিলে। যারা ভাতের সঙ্গে বাটি বাটি ঘি আর দুদু খায়, আর এমনি বালিশের উপর ঠেস দিয়ে বসে তাদের কতয়ে সুখী কি আর আছে?

তামাক লইয়া রামের প্রবেশ

রাম। ও কি ও? তুই যে আবার ওখানে বসিছিস্?

গদা। একবার ভাই বাবুগিরি করে জন্মটা সফল করে নি। দে, ঝঁকটা দে। কস্তাবাবুর ফরসিটে আনতিস্ তো আরও মজা হতো। (ঝঁকা গ্রহণ।)

রাম। হা। হা। হা। তুই বাবুদের মতন্ তামাক খেতে কোথায় শিখলি রে? এ যে ছাতারের নেত্য। হা। হা। হা!

গদা। হা। হা। হা। তুই ভাই একবার আমার গা-টা টেপ্ তো।

রাম। মন্ শালা, আমি কি তোর চাকোর? হা। হা। হা!

গদা। তোর পায় পড়ি ভাই, আয় না। আচ্ছা, তুই একবার আমার গা টিপে দে, আমি নৈলে আবার তোর গা টিপে দেব এখন।

রাম। হা। হা। হা। আচ্ছা, তবে আয়।

গদা। রোস্, ঝঁকটা আগে রেখে দি। এখন আয়।

রাম। (গাত্র টেপন।)

গদা। হা। হা। হা। মন্, অমন্ করে কি টিপতে হয়?

রাম। কেমন, এখন ভাল লাগে তো। হা। হা। হা!

গদা। আজ ভাই ভারি মজা কল্যেম, হা! হা! হা!!

রাম। (নেপথ্যাভিমুখে অবলোকন করিয়া) পালা রে পালা, ঐ দেখ কস্তাবাবু আস্চে।

ঝঁকা লইয়া হাসিতে ২ বেগে প্রস্থান।

গদা। (গাত্রোত্থান করিয়া স্বগত) বুড় বেটা এমন সময়ে এসে সব নষ্ট কল্যে। ইস্! আজ বুড়র ঠাঁট দেখলে হাসি পায়! শান্তিপুর্বে ধুতি, জামদানের মেরজাই, ঢাকাই চাদোর, জরির জুতো, আবার মাথায় তাজ। হা। হা। হা!

ভক্তবাবুর পুনঃপ্রবেশ

ভক্ত। ও গদা।

গদা। আঙ্কেএএএ।

ভক্ত। ওরা কি এসেছে বোধাইয়?

গদা। আঙ্কে, এতক্ষণে এসে থাক্তে পারবে, আপনি আসুন।

ভক্ত। যা তুই আগে যেয়ে দেখে আয় গে।

গদা। যে আঙ্কে।

[প্রস্থান।

ভক্ত। (স্বগত) এই তাজ্টা মাথায় দেওয়া ভালই হয়েছে। নেড়ে মাগীরা এই সকল ভালবাসে; আর এতে এই একটা আরও উপকার হ্চ্যে যে টিকিটা ঢাকা পড়েছে। (উচ্চৈঃস্বরে) ও রামা—

নেপথ্যে। আঙ্কে যাই।

ভক্ত। আমার হাতবান্ধটা আর আরসিখানা আন্ তো। (স্বগত) দেখি, একটু আতর গায় দি। নেড়েরা আবাল বৃদ্ধ বনিতা আতরের খোসবু^{২২} বড় পছন্দ করে, আর ছোট শিশিটাও টেকে করে সঙ্গে নে যাই। কি জানি যদি মাগীর গায়ে প্যাজের গন্ধ টঙ্ক থাকে, না হয় একটু আতর মাথিয়ে তা দূর করবো।

বান্ধ ও আরসি লইয়া রামের পুনঃপ্রবেশ

ভক্ত। (আরসিতে মুখ দেখিয়া আতরের শিশি লইয়া বান্ধ পুনরায় বন্ধ করিয়া) এই নে যা, আর দেখ, যদি কেউ আসে তো বলিস্ যে আমি এখন জপে আছি।

রাম। যে আঙ্কে।

[প্রস্থান।

ভক্ত। (পরিষ্করণ করিয়া স্বগত) আঃ! গদা বেটা যে এখনও আস্চে না? বেটা কুড়ের শেষ।

গদার পুনঃপ্রবেশ

কি হলো রে?

গদা। আঙ্কে, পিসী তাকে নে গেছে, আপনি আসুন।

ভক্ত। তবে চল্ যাই।

[উভয়ের প্রস্থান।

দ্বিতীয় গর্ভাক্ষ

এক উদ্যানের মধ্যে এক ভগ্ন শিবের মন্দির

বাচস্পতি ও হানিফের প্রবেশ

বাচ। ও হানিফ!

হানি। জী।

বাচ। এই তো সেই শিবমন্দির; এখনো তো দেখছি কেউ আসে নি। তা চল, আমরা ঐ অশ্বখ গাছের উপরে এই বেলা লুকিয়ে বসে থাকি গে।

হানি। আপনার যেমন মরজি।

বাচ। কিন্তু দেখ, আমি যতক্ষণ না ইসারা করি, তুই চুপ করে বসে থাকিস।

হানি। ঠাঙ্গর, তা তো থাকপো; লেকিন্^{২০} আমার সামনে যদি আমার বিবির গায়ে হাত দেয়, কি কোন রকম বেইজ্জৎ কত্তি যায়, তা হলি তো আমি তখনি সে হারামজাদা বেটার মাথাটা টান্যে ছিড়ে ফেলাবো! আমার তো এখনে আর কোন ভয় নেই; আমি দোসরা এলাকায় ঘরের ঠ্যাকনা করিছি।

বাচ। (স্বগত) বেটা একে সাক্ষাৎ যমদূত, তাতে আবার রেগেছে, না জানি আজ একটা কি বিভ্রাটই বা ঘটায়। (প্রকাশে) দেখ হানিফ, অমন রাগলে চলব্যে না, তা হলে সব নষ্ট হবে; তুই একটু স্থির হয়ে থাক।

হানি। আরে থোও ম্যানে, ঠাঙ্গর! আমার লছ^{২১} গরম হয়ে উঠতেছে, আর হাত দুখানা যেন নিস্পিস্ কন্তেছে, একবার শালারে এখন পালি হয়, তা হলি মনের সাথে তারে কিলয়ে গেরাম ছাড়ো যাব, আর কি?

বাচ। না তবে আমি এর মধ্যে নাই; আমার কথা যদি না শুনি তবো আমি চল্যোম। (গমনোদ্যত)

হানি। আরে, রও না, ঠাঙ্গর! এত গোসা হতেছ কেন? ভাল, কও দিনি, আমি এখানে যদি চুপ করে থাকি তা হলি আখেরে^{২২} তো শালারে শোধ দিতি পারবো?

বাচ। হাঁ, তা পারবি বৈকি।

হানি। আচ্ছা, তবে চল, তুমি যা বলবে তাই করবো এখনে।

বাচ। তবে চল, ঐ গাছে উঠে চুপ করে বসে থাকি গে।

উভয়ের প্রস্থান।

ফতেমা ও পুঁটি প্রবেশ

ফতে। ও পুঁটি দিদি! মোরে এ কোথায় আনে ফ্যালালি? না ভাই, মোরে বড় ডর লাগে, সাপেই খাবে না কি হবে কিছু কতি পারি নে।

পুঁটি। আরে এই যে শিবের মন্দির, আর তো দু কোশ পাঁচ কোশ যেতে হবে না। ও এইখানে দাঁড়া না। কস্তাবাবু ততখন আসুন।

ফতে। না ভাই, যে আঁদার, বড় ডর লাগে। এই বনের মন্দি মোরা দুটিতি কেমন কোরে থাকপো?

পুঁটি। (স্বগত) বলে মিথ্যে নয়। যে অঙ্ককার, গা-টাও কেমন ছম্ ছম্ করে, আবার শুনেছি এখানে না কি ভূতের ভয়ও আছে। (পশ্চাতে দৃষ্টি করিয়া) আঃ, ঐর্যে আর আসা হয় না।

ফতে। তুই নৈলে থাক ভাই, মুই আর রতি পারবো না। (গমনোদ্যত।)

পুঁটি। (ফতের হস্ত ধারণ করিয়া) আ মর, ছুঁড়ী! আমি থাকলে কি হবে? (স্বগত) হায়, আমার কি এখন আর সে কাল আছে? তালশাস পেকে শক্ত হল্যে আর তাকে কে খেতে চায়? (প্রকাশে) তুই, ভাই, আর একটুখানি দাঁড়া না। কস্তাবাবু এলো বল্যে।

ফতে। না ভাই মুই তোর কড়ি পাতি চাইনে, মোর আদমি এ কথা মালুম কতি পালি মোরে আস্তো রাখপে না।

পুঁটি। আরে, মিছে ভয় করিস কেন? সে কেমন করে জানতে পারবে বল; সে কি আর এখানে দেখতে আসছে? তা এতো ভয়ই বা কেন? একটু দাঁড়া না। (সচকিতে স্বগত) ও মা, ঐ মন্দিরের মধ্যে কি একটা শব্দ হলো না? রাম! রাম! রাম! (ফতেকে ধারণ।)

ফতে। (বিষম ভাবে) তুই যদি না ছাড়িস ভাই তবে আর কি করবো; এখানে আত্মা যা করে। তা চল মোরা ঐ মসজিদের মন্দি যাই;

আবার এখানে কেটা কোন দিক হতে দেখতি পাবে।

পুঁটি। না না না, এই ফাঁকেই ভালো। (স্বগত) আঃ, এ বুড় ডেকরা মরেছে না কি?

ফতে। (সচকিতে) ও পুঁটি দিদি, এ দেখ দেখি কে দুজন আসচে, আমি ভাই এ মসজিদের মন্দি নুকুই।

পুঁটি। না লো না, এখানে দাঁড়া না। আমি দেখছি, বুবি আমাদের কত্তাবাবুই বা হবে। (দেখিয়া) হাঁ তো, এ যে তিনিই বটে আর সঙ্গে গদা আসচে। আঃ, বাঁচলেম।

ফতে। না ভাই, মুই যাই।

পুঁটি। আরে, দাঁড়া না; যাবি কোথা?

ভক্ত ও গদাধরের প্রবেশ

পুঁটি। আঃ, কত্তাবাবু কতক্ষণ দাঁড়িয়ে দাঁড়িয়ে পা ধরে গিয়েছে।^৩ খনি দেরি কল্যান বলে আমরা আরো ভাবছিলেম, ফিরে যাই।

ভক্ত। হ্যাঁ, একটু বিলম্ব হয়েছে বটে তা এই যে আমার মনোমোহিনী এসেছেন। (স্বগত) আহা, যবনী হোলো তায় বয়্যে গেল কি? ছুঁড়ী রূপে যেন সাক্ষাৎ লক্ষ্মী! এ যে আঁস্তাকুড়ে সোণার চাঙ্গড়! (প্রকাশে গদার প্রতি) গদা, তুই একটু এগিয়ে দাঁড়া তো যেন এদিকে কেউ না এসে পড়ে।

গদা। যে আঞ্জে।

ভক্ত। ও পুঁটি, এটি তো বড় লাজুক দেখছি রে, আমার দিকে একবার চাইতেও কি নাই? (ফতের প্রতি) সুন্দরি, একবার বদন তুলে দুটো কথা কও, আমার জীবন সার্থক হউক। হরিবোল, হরিবোল!—তায় লজ্জা কি?

গদা। (স্বগত) আর ও নাম কেন? এখন আন্না আন্না বলো।

ভক্ত। আহা! এমন খোস-চেহারা কি হানফের ঘরে সাজে? রাজরাণী হোলে তবে এর যথার্থ শোভা পায়।

“ময়ুর চকোর শুক চাতকে না পায়।

হায় বিধি পাকা আম দাঁড়কাকে খায়।।”

বিধুমুখি, তোমার বদনচন্দ্র দেখে আজ আমার মনকুমুদ প্রফুল্ল হোলো।—আঃ!

পুঁটি। (স্বগত) কত্তা আজ বাদে কাল শিঙ্গে ফুকবেন, তবু রসিকতটুকু ছড়েন না। ও মা! ছাইতে কি আগুন এত কালও থাকে গা? (প্রকাশে) কত্তাবাবু, ও নেড়েদের মেয়ে, ওরা কি ওসব বোঝে?

ভক্ত। আরে, তুই চুপ্ কর না কেন?

পুঁটি। যে আঞ্জে।

ফতে। পুঁটি দিদি, মুই তোর পায়ে সেলাম করি, তুই মোকে হেতা থেকে নিয়ে চল।

পুঁটি। আ মর, একশো বার এ কথা? বাবু এত করে বলচে তবু কি তোর আর মন ওঠে না? হাজার হোক নেড়ের জাত কি না, কথায় বলে “তেতুল নয় মিষ্টি, নেড়ে নয় ইষ্টি।” কত্তাবাবুকে পেলে কত বামুণ কায়তে বতো; যায়, তা তুই নেড়ে বৈ ত নস্ তোদের জাত আছে, না ধম্ম আছে? বরং ভাগ্যি করে মান্ যে বাবুর চোখে পড়েছি।

ফতে। না ভাই, মুই অনেকক্ষণ ঘর ছেড়ে এসেছি, মোর আদম্মি আসে এখনি মোকে খোঁজ করবে, মুই যাই ভাই।

ভক্ত। (অঞ্চল ধারণ করিয়া) প্রেয়সি, তুমি যদি যাবে, তবে আমি আর বাঁচবো কিসে?—তুমি আমার প্রাণ—তুমি আমার কলিজা—তুমি আমার চন্দে পুরুষ!

“তুমি প্রাণ, তুমি ধন, তুমি মন, তুমি জন, নিকটে যে ক্ষণ থাক সেই ক্ষণ ভাল লো।

যত জন আর আছে, তুচ্ছ করি তোমা কাছে,

ত্রিভুবনে তুমি ভাল আর সব কাল লো।।”^{৩৩}

তা দেখ ভাই, বুড় বল্যে হেলা করো না; তুমি যদি চলে যাও তা হলে আর আমার প্রাণ থাকবে না।

গদা। (স্বগত) ভেলা মোর ধন রে? এই তো বটে।

পুঁটি। কত্তাবাবু, ফতির ভয় হচে যে পাছে ওকে কেউ এখানে দেখতে পায়; তা এ মন্দিরের মধ্যে গেলেই ত ভাল হয়।

ভক্ত। (চিন্তিত ভাবে) অ্যা—মন্দিরের মধ্যে?—হাঁ; তা ভগ্নশিবে তো শিবজ্বলি, তার ব্যবস্থাও নিয়েছি। বিশেষ এমন স্বর্গের অঙ্গরীর জন্যে হিন্দুয়ানি ত্যাগ করাই বা কোন্ ছার?

নেপথ্যে গভীর স্বরে। বটে রে পাষণ্ড নরাধম দুরাচার? (সকলের ভয়।)

ভক্ত। (সত্রাসে চতুর্দিকে দেখিয়া) অ্যা—আ—আ—আ—আমি না! ও বাবা! এ কি? কোথা যাব!

পুঁটি। (কম্পিত কলেবরে) রাম—রাম—রাম—রাম। আমি তখনি ত জানি—রাম—রাম—রাম।

ভক্ত। ও গদা! কাছে আয় না।

গদা। (কম্পিত কলেবরে) আগে বাঁচি, তবে—

(নেপথ্যে হুঙ্কার ধ্বনি।)

পুঁটি। ই—ই—ই—ই! (ভূতলে পতন ও মুচ্ছা।)

ভক্ত। রাধাশ্যাম—রাধাশ্যাম!—ও মা গো—কি হবে!

(নেপথ্যে।) এই দেখ না কি হয়?

ভক্ত। (কর ঘোড় করিয়া সকাতির) বাবা! আমি কিছু জানি নে, দোহাই বাবা, আমাকে ক্ষমা কর। (অষ্টাঙ্গে প্রাণিপাত।)

(গুপ্ত ও চিবুক বন্দ্রাবৃত করিয়া হানিকের দ্রুত প্রবেশ, গদাকে চপেটাঘাত ও তাহার ভূতলে পতন, পরে ভক্তের পৃষ্ঠদেশে বসিয়া মুষ্টিঘাত এবং পুঁটিকে পদপ্রহার করিয়া বেগে প্রস্থান।)

ভক্ত। আঁ—আঁ—আঁ!

(নেপথ্য হইতে বাচস্পতির রামপ্রসাদী পদ—“মায়ের এই তো বিচার বটে, বটে বটে গো আনন্দময়ি, এইতো বিচার বটে,” এবং প্রবেশ।)

গদা। (দেখিয়া) এই যে দাদাঠাকুর এসেছেন। আঃ! বাঁচলেন; বামুণের কাছে ভূত আসতে পায় না! (পৃষ্ঠদেশে হাত বুলাইয়া) বাবা! ভূতের হাত এমন কড়া।

বাচ। একি! কস্তাবাবু যে এমন করে পড়ে রয়েছে?—হয়েছে কি? অ্যা?

ভক্ত। (বাচস্পতিকে দেখিয়া গাত্ৰোখান করিয়া) কে ও? বাচপোৎ দাদা না কি? আঃ; ভাই, আজ ভূতের হাতে মরেছিলাম আর কি? তুমি যে এসে পড়েছো, বড় ভাল হয়েছে।

পুঁটি। (চেতন পাইয়া) রাম—রাম—রাম—রাম!

গদা। ও পিসি, সেটা চলে গিয়েছে, আর ভয় নাই, এখন ওঠ।

পুঁটি। (উঠিয়া) গিয়েছে। আঃ, রক্ষে হোলো। তা চল, বাছ, আর এখানে নয়; আমি বেঁচে থাকলে অনেক রোজগার হবে! (বাচস্পতিকে দেখিয়া) ও মা! এই যে ভট্টচাঞ্জি মোশাই এখানে এসেছেন।

বাচ। কস্তাবাবু, আমি এই দিক দিয়ে যাচ্ছিলেম, মানুষের গোঁগানির শব্দ শুনে এলেম। তা বলুন বেখি ব্যাপারটাই কি? আপনিনি বা এ সময়ে এখানে কেন? আর এরাই বা কেন এসেছে? এ তো দেখছি হানিফ্ গাজীর মাগ।

ভক্ত। (স্বগত) এক দিকে বাঁচলেম, এখন আর এক দিকে যে বিষম বিভ্রাট! করি কি? (প্রকাশে বিনীত ভাবে) ভাই, তুমি তো সকলি বুঝেছ, তা আর লজ্জা দিও না। আমি যেমন কৰ্ম করেছিলাম তার উপযুক্ত ফলও পেয়েছি। তা হ্যাঁদেখ ভাই, তোমার হাতে ধরে বলচি, এই ভিক্ষাটি আমাকে দেও, যে এ কথা যেন কেউ টের না পায়। বড় বয়েসে এমন কথা প্রকাশ হলে আমার কুলমানে একেবারে ছাই পোড়বে। তুমি ভাই, আমার পরম আত্মীয়, আমি আর অধিক কি বলবো।

বাচ। সে কি, কস্তাবাবু? আপনি হলেন বড়মানুষ—রাজা; আর আমি হলেম দরিদ্র ব্রাহ্মণ, আর সেই ব্রাহ্মণটুকু যাওয়া অবধি দিনান্তেও অন্ন খোটা ভার; তা আমি আপনার আত্মীয় হব এমন ভাগ্য কি করেছে?

ভক্ত। হয়েছে—হয়েছে, ভাই! আমি কলাই তোমার সে ব্রহ্মত্র জমি ফিরে দেবো, আর দেখ, তোমার মাতৃশ্রদ্ধে আমি যৎসামান্য কিঞ্চিৎ দিয়েছিলাম, তা আমি তোমাকে নগদ আরও পঞ্চাশটি টাকা দেবো, কিন্তু এই কৰ্মটি করবো

যেন আজকের কথাটা কোনরূপে প্রকাশ না হয়।

বাচ। (হাস্যমুখে) কস্তাবাবু, কন্মটি বড় গর্হিত হয়েছে অবশ্যই বলতে হবে; কিন্তু যখন ব্রাহ্মণে কিঞ্চিৎ দান কতো স্বীকার হলেন, তখন তার তো এক প্রকার প্রায়শ্চিত্তই করা হলো, তা আমার সে কথার প্রসঙ্গেই বা প্রয়োজন কি?—তার জন্যে নিশ্চিত থাকুন।

স্বাভাবিক বেশে হানিফ গাজীর প্রবেশ

হানি। কস্তাবাবু, সালাম করি।

ভক্ত। (অতি ব্যাকুল ভাবে) এ কি! আঁ।

এ আবার কি সর্বনাশ উপস্থিত?

হানি। (হাস্যমুখে) কস্তাবাবু, আমি ঘরে আস্যে ফতিরি তন্মাস্ কন্মাম, তা সকলে কলে যে সে এই ভান্না মন্দিরির দিকে পুঁটির সাথে আয়েছে, তাই তারে টুঁড়তি টুঁড়তি আস্যে পড়িছি। আপনার যে মোছলমান হতি সাধ গেছে, তা জান্তি পাল্লি, ভাবনা কি ছিল? ফতি তো ফতি, ওর চায়েও সোণার চাঁদ আপনারে আন্যে দিতি পাষ্টাম, তা এর জন্যি আপনি এত তজ্জদি^{১০} নেলেন কেন? তোবা তোবা।

ভক্ত। (চিন্তা করিয়া নম্রভাবে) বাবা হানিফ, আমি সব বুঝেছি, তা আমি যেমন তোমার উপর অহেতু অত্যাচার করেছিলেম, তেমনি তার বিধিমত শান্তিও পেয়েছি, আর কেন? এখন ক্ষান্ত দাও। আমি বরঞ্চ তোমাকে কিছু দিতেও রাজি আছি, কিন্তু বাপু এ কথা যেন আর প্রকাশ না হয়, এই ভিক্ষাটি আমি চাই। হে বাবা, তোর হাতে ধরি।

হানি। সে কি কস্তাবাবু?—আপনি যে নাড়োদের এত গাল্ পাড়তেন, এখনে আপনি খোদ্ সেই নাড়ো হতি বসেছেন, এর চায়ে খুনীর কথা আর কি হতি পারে? তা এ কথা তো আমার জাত কুটুমগো কতিই হবে।

ভক্ত। সর্বনাশ!—বলিস্ কি হানিফ? ও বাচপোৎ দাদা, এইবারেই তো গেলেম। ভাই, তুমি না রক্ষে কল্যে আর উপায় নাই। তা

একবার হানিফকে তুমি দুটো কথা বুঝিয়ে বলে।।

বাচ। (ঈষৎ হাস্যমুখে) ও হানিফ, একবার এদিকে আয় দেখি, একটা কথা বলি। (হানিফকে এক পার্শ্বে লইয়া গোপনে কথোপকথন।)

ভক্ত। রাধে—রাধে—রাধে, এমন বিভ্রাটে মানুষ পড়ে। একে তো অপমানের শেষ; তাতে আবার জাতের ভয়। আমার এমনি হচে যে পৃথিবী দু ভাগ হলে আমি এখনি প্রবেশ করি। যা হোক, এই নাকে কাণে খত, এমন কন্মের আর নয়।

ফতে। (অগ্রসর হইয়া সহাস্য বদনে) কেন, কস্তাবাবু?—নাড়োর মায়ে কি এখনে আর পছন্দ হচ্ছে না?

ভক্ত। দূর হ, হতভাগি, তোর জন্যেই ত আমার এই সর্বনাশ উপস্থিত।

ফতে। সে কি, কস্তাবাবু?—এই, মুই আপনার কল্জে হচ্ছেলাম, আরো কি কি হচ্ছেলাম; আবার এখন মোরে দূর কন্তি চাও।

ভক্ত। কেবল তোকে দূর? এ জঘন্য কন্মটিই আজ অবধি দূর কল্যেম। এতোতেও যদি ভক্তপ্রসাদের চেতন না হয়, তবে তাঁর বাড়ি গর্দভ আর নাই।

গদা। (জনাস্তিকে) ও পিসি, তবেই তো গদার পেসা উঠলো!

পুঁটি। উঠুক বাছ; গতর থাকে তো ভিক্ষে মেগে খাবো। কে জানে মা যে নেড়ের মেয়েগুলর সঙ্গে পোষা ভৃত থাকে? তা হলে কি আমি এ কাজে হাত দি?

বাচ। (অগ্রসর হইয়া) কস্তাবাবু, আপনি হানিফকে দুটি শত টাকা দিন, তা হলেই সব গোল মিটে যায়।

ভক্ত। দু-শো টা-কা! ও বাবা, আমি যে ধনে প্রাণে গেলেম। বাচপোৎ দাদা, কিছু কন্ম জন্ম কি হয় না?

বাচ। আশ্চেনা, এর কমে কোন মতেই হবে না।

ভক্ত। (চিন্তা করিয়া) আচ্ছা, তবে চল, তাই দেব। আমি বিবেচনা করে দেখলেম যে এ কস্মের দক্ষিণান্ত এইরূপেই হওয়া উচিত। যা হোক ভাই, তোমাদের হতে আমি আজ বিলক্ষণ উপদেশ পেলেম। এ উপকার আমি চিরকালই স্বীকার করবো। আমি যেমন অশেষ দোষে দোষী ছিলাম, তেমনি তার সমুচিত প্রতিফলও পেয়েছি। এখন নারায়ণের কাছে এই প্রার্থনা করি যে এমন দুঃস্বচ্ছতি যেন আমার আর কখন না ঘটে।

বাইরে ছিল সাধুর আকার,
মনটা কিন্তু ধর্ম খোয়া।
পুণ্য খাতায় জমা শূন্য,
উশামিতে চারটি পোয়া।।
শিক্ষা দিলে কিলের চোটে,
হাড় গুড়িয়ে খোয়ের মোয়া।
যেমন কর্ম ফললো ধর্ম,
“বুড় সালিকের ঘাড়ে রোয়া।।”
[সকলের প্রস্থান।
যবনিকা পতন